

ТОШКЕНТ ҲАҚИҚАТИ

1928 йил 11 декабрда асос солинган

Ўзбекистон Республикаси
Президентининг
ҚАРОРИ

2015 ЙИЛГИ НАВРЎЗ УМУМХАЛҚ БАЙРАМИГА ТАЙЁРГАРЛИК КЎРИШ ВА УНИ ЎТКАЗИШ ТЎҒРИСИДА

Неча минг йиллар давомида азалий қадриятларимизни ўзида мужассам этиб, аждодларимиздан бизга мерос бўлиб келаётган Наврўзнинг истиклол йилларида ҳаётимиздаги ўрни ва моҳияти тобора ошиб бормоқда. Халқимиз учун табиат уйғониши, шарқона янги йилнинг бошланиши, асл миллий, энг ардоқли байрам бўлмиш Наврўз айёмини юртимизнинг барча ҳудуд ва минтақаларида ҳар томонлама чуқур тайёргарлик билан кутиб олиш ва нишонлаш эзгу, бир сўз билан айтганда, табиий анъанага айланиб қолди.

Ушбу миллий байрамнинг маънавий ҳаётимиздаги ўрни ва таъсири, инсоннинг табиат билан ҳамоҳанг бўлиб яшати, жамиятимизда меҳр-оқибат ва ҳамжихатлик, кексаларга эъзоз ва эҳтиром, кичикларга иззат кўрсатиш, одамлилик, яхши кўшничилик, хайр-саховат, бағрикенглик ва бунёдкорлик муҳитини янада мустаҳкамлаш, ёш авлодни миллий анъаналаримизга садоқат ва умуминсоний қадриятларга ҳурмат руҳида камол топтириш борасида Наврўзнинг моҳияти ва аҳамияти тобора ортиб бораётганини инобатга олиб ҳамда бу қутлуг айёмни юксак савияда нишонлаш мақсадида:

1. 2015 йилги Наврўз умумхалқ байрамига тайёргарлик кўриш ва уни ўтказиш бўйича ташкилий қўмита таркиби иловага мувофиқ тасдиқлансин.

Ташкилий қўмита Наврўз байрамини пойтахтимиз Тошкент шаҳрида, Қорақалпоғистон Республикаси ва вилоятлар марказларида, барча шаҳар, туман ва қишлоқларда умумхалқ сайиллари шаклида кўтаринки руҳда ўтказишга қаратилган ташкилий-амалий, маданий-маънавий тадбирлар режасини ишлаб чиқсин ва амалга оширсин.

2. Тадбирлар режасини тайёрлашда қуйидаги масалаларга алоҳида эътибор қаратилсин:

айни Наврўз фаслида инсон ўзини табиатнинг ажралмас, узвий бир қисми сифатида ҳис этишини ифода қиладиган, атроф-муҳитни, она заминни эъзозлаб, унинг неъматларини, бугунги тинч ҳаётни қадрлаб, шукроналик туйғуси билан яшашга даъват этадиган маънавий-маърифий тадбирларни уюштириш;

жойларда бўлиб ўтадиган тадбирларда, оммавий ахборот воситаларида Наврўз байрамининг тарихи, уни нишонлаш билан боғлиқ урф-одат, анъана ва қадриятларимизнинг моҳияти ва аҳамиятини кенг ёритиш;

мамлакатимизда яшаётган, миллати, тили ва динидан қатъи назар, барча юртдошларимиз учун сеvimли байрамга айланган Наврўзнинг руҳи ва фалсафасида мужассам бўлган ахлилик ва тотувлик, меҳру саховат, ёши улуг инсонларни ҳар томонлама эъзозлаш, қўмакка муҳтож инсонларга бегараз ёрдам бериш билан боғлиқ тадбирларни амалга ошириш;

янгидеҳқончилик мавсумининг бошланиши, яшариш ва янгилашни, қут-барақа, ободлик ва фаровонлик рамзи бўлмиш Наврўз фаслида маҳаллаларда, шаҳар ва қишлоқларимизда ҳашарлар, кенг қўламдаги ободончилик ва қўаламзорлаштириш ишларини ташкил этиш;

Қорақалпоғистон Республикасида, вилоятлар марказлари ва Тошкент шаҳрида бўлиб ўтадиган байрам дастурларига фольклор гуруҳлари, бадий ҳаваскорлик жамоалари, оилавий ансамбллар, бахши-шоирлар, шунингдек, профессионал ижрочилар ва истеъдодли эстрада артистларини танлов асосида жалб этиш;

байрам дастурларини тайёрлашда фольклор санъатининг энг яхши намуналарини, халқ уйинларига, эл-юртимизнинг дилидан чуқур жой олган тарихий урф-одатларга, гўзал инсоний туйғуларни тараннум этадиган мумтоз куй ва қўшиқлар, ўлан ва лапарларга кенг ўрин бериш.

3. Белгилаб қўйилсинки, ўтказиладиган байрам тадбирлари:

Қорақалпоғистон Республикаси ва вилоятларда маҳаллий бюджетлар ҳамда хайрия маблағлари ҳисобидан;

Тошкент шаҳрида республика бюджети ва Тошкент шаҳар маҳаллий бюджети маблағлари ҳисобидан тенг улушларда қўлланади.

4. Ўзбекистон Миллий ахборот агентлиги, Ўзбекистон Миллий телерадиокомпанияси, "Жаҳон" ахборот агентлиги ва бошқа оммавий ахборот воситаларига Наврўз умумхалқ байрамига тайёргарлик кўриш ва уни ўтказиш бўйича амалга оширилаётган ишларни атрофлича ёритиб бориш тавсия этилсин.

5. Мазкур қарорнинг бажарилишини таъминлаш Ўзбекистон Республикасининг Бош вазири Ш. Мирзиёев зиммасига юклансин.

Ўзбекистон Республикаси
Президенти

И. КАРИМОВ.

Тошкент шаҳри, 2015 йил 25 февраль.

Қўқлам шуқуқ

ЯХШИ ЙИЛ НАВРЎЗИДАН МАЪЛУМ


"Барчамиз доимо орзиқиб қутадиған ва катта хурсандчилик, шодиёна билан ўтказадиган Наврўз байрами биз учун ҳаёт абадийлиги, табиатнинг

устувор қудрати ва чексиз саховатининг, кўп минг йиллик миллий қиёфамиз, олижаноб урф-одатларимизнинг бетакрор ифодаси бўлиб келмоқда..."

Президентимизнинг азалий қадриятларимиз кўзгуси бўлган Наврўзи олам таърифида айтган ушбу сўзлари ҳар сафар шу муаззам она замин узра бир ажиб илиқлик уфуриб, кўнгилда ором, ҳаловат, шу билан бирга мусоффо орзу-умидлар уйғотувчи қўқлам насимлари эса бошлаганда ўзининг теран маъносини тўла намоён этади. Зотан, ер юзида ҳеч бир миллат, ҳеч бир элатнинг бу борлиқда инсон ва табиат уйғунлигидек буюқ ҳикмат, нодир фалсафани ўзида акс эттирган Наврўздеқ боқий байрами бўлмаса керак. Шу боис, халқимиз ҳамиша бу айёмни ўзгача кўтаринкилик, муносиб тадорик билан қарши олади.

Президентимизнинг қуни кеча қабул қилинган "2015 йилги Наврўз умумхалқ байрамига тайёргарлик кўриш ва уни ўтказиш тўғрисида"ги Қарориди алоҳида қайд этилганидек, жамиятимизда меҳр-оқибат ва ҳамжихатлик, кексаларга эъзоз ва эҳтиром, кичикларга иззат кўрсатиш, одамлилик, яхши кўшничилик, хайр-саховат, бағрикенглик ва бунёдкорлик муҳитини янада мустаҳкамлаш, ёш авлодни миллий анъаналаримизга садоқат ва умуминсоний қадриятларга ҳурмат руҳида камол топтиришда Наврўзнинг моҳияти ва аҳамияти тобора ортиб бормоқда. Шу боис қумуш қиш хали сўнгги ҳақини олмай туриб, кўнгилларда Наврўз шуқуқи уйғонди, жойларда байрамни муносиб кўтиб олиш учун қизғин тайёргарлик бошланиб кетди.

Бу галги байрам билан боғлиқ тантана ва маросим-



ларда Наврўз тарихи, уни нишонлашга боғлиқ азалий урф-одат, анъана ва қадриятларимиз, шунингдек, она заминни эъзозлаш, бугунги тинч ва осуда ҳаётни қадрлаш, шукроналик туйғуси билан яшаш, кўп миллатли халқимизга хос тотувлик, бағрикенглик ва саховатпешалик каби олижаноб фазилатлар ўз ифодасини топади. Яшариш ва янгилашни, қут-барақа, ободлик ва фаровонлик рамзи бўлмиш Наврўз айёми баҳонасида маҳаллаларда, шаҳар ва қишлоқларимизда ҳашарлар, кенг қўламдаги ободончилик ва қўаламзорлаштириш ишлари ташкил этилади. Янги деҳқончилик мавсуми бошланиб, элимиз

ризки бутун, ҳаёти фаровон бўлиши учун барақа уруғлари қадалади.

Наврўз қут-барақа йўллари очувчи айём сифатида ҳам эъзозланиб келинган. Бу янги деҳқончилик мавсуми айнан шу кундан бошланишига ишора. Бобокалонимиз Алишер Навоийнинг "Ҳар тунинг қадр ўлубон, ҳар кунинг ўйсин Наврўз" деган гўзал байтларида ҳам халқимизнинг бу қутлуг байрами ниҳоятда юқори рутбага қўйилгани бежиз эмас. Ҳазратнинг "Маҳбул қулуб" асарида эса, алоҳида "Деҳқонлар зикрида" деб номланган боб бўлиб, бу фаслда деҳқон меҳнати, матонат шарафланиди: Олам маъмурлиги алар-

дин, алам аҳли масрурлиги алардин...

Ўки: Деҳқонки дон сочар, ерни ёрмоқ била ризқ йўлин очар...

Дарвоқе, туркий халқлар фойдаланиб келган тақвимга кўра, айнан шу кундан қўй мучали бошланади. Қадимда шарқона янги йилнинг қандай келиши мучал ҳисобида-ги хайвонларга ҳам боғлиқ деб қаралган ва шунга қаттиқ ишонилган. Негаки, бу тақвим анчайин мукаммал "ишланган" бўлиб, кўп асрлар давомида қайси мучалда қандай об-ҳаво бўлишига пухта ўрганилган. Масалан, тўнгиз йилида ёғингарчилик кўп бўлса, сигир йили жуда баракали келар эмиш. Қўй йили

эса янада хосиятли экан.

Бунинг боиси, биласиз, Шарқ халқларида қўй азалдан фаровонлик, тўқинлик рамзи бўлиб келган, дейди Вилоят педагог кадрларни қайта тайёрлаш ва малакасини ошириш институти доценти, фольклоршунос олим Омонул-ла Маъдаев. – Одатда, қўй йилида жуда қулай об-ҳаво кузатилади. Деҳқончилик ва чорвачиликнинг барорини берган. Айниқса, элнинг ризқ-насибаси бўлган бугдойдан баракали ҳосил кўтарилган. Озиқ-овқат, мева-чева, ноз-неъматлар сероб бўлган. Яна бир жиҳат – қўй беозор, ювош жонзот. Шунданми, унинг номи билан келадиган йилларда одамлар табиатида ҳам қандайдир ҳалимлик, оғир-босиқлик, вазминлик, мулоҳазалилик кузатилади. Бутун бошли халқлар, элатлар ўртасидаги низо ва адоватлар, қирғинбарот урушлар айнан шу паллада барҳам топангани ҳам тарихда мисоллар кўп.

Нима бўлганда ҳам, биз эзгу ниятли халқмиз. Бинобарин, фасллар келинчаги, яшариш ва янгилашни айёмидан умид ва қўтқанларимиз бисёр. Ана шу умидлар ифодаси янгилиг ҳализамон деҳқон даласига йўл олади, янги иморатларга тамал тоши қўйилади, ёшларга оқ фотиҳа берилиб, тўйлар тадориги бошланади кетади. "Яхши одам қўзидан, яхши йил Наврўзидан маълум", деганларидек, бу паллада қилинган ҳар бир яхши ният, савобли ишлар йил бўйи инсонга зеб бағишлайди, ҳаётини серфайз ва нурафшон қилади.

Наврўздан дарак келди. Маррани баланд олиб, эзгу ишларга ошқинг, замондош! Шерзод ШУХРАТОВ.

Комиссия йиғилиши

САЙЛОВ УЧАСТКАЛАРИ ФАОЛИЯТИ ЎРГАНИЛАДИ

Зангиота туманидаги 640-сайлов участкасида 10-Тошкент вилояти округ сайлов комиссиясининг сайёр йиғилиши бўлиб ўтди.

Вилоят соғлиқни сақлаш, халқ таълими бошқармалари, "Тошкент Телеком" акциядорлик жамияти ва оммавий ахборот воситалари вакиллари иштирок этган йиғилишда

худудий участка сайлов комиссияси аъзоларининг сайлов кампанияси жараёнидаги фаоллиги ҳамда сайлов қонунчилигидан қай даражада ҳабардорлигини ўрганишга асо-



сий эътибор қаратилди.

Иштирокчилар участка сайлов комиссиялари ишини ташкил этиш, овоз бериш биносини қонунда белгиланган тартибда жиҳозлаш, сайловчилар рўйхатини тузиш ва уларни Ўзбекистон Республикаси Президентлигига номзодлар, шунингдек, сиёсий партияларнинг сайловолди дастурлари билан таништириш каби масалаларни муҳокама қилиб, тавсиялар беришди.

Сайёр йиғилишда 640-сайлов участкаси раиси Ибодул-ла Бобожоновнинг мазкур сайлов участкасида амалга оширилаётган ишлар, округ сайлов комиссияси аъзоси, Зангиота туманига бириктирилган вакил Мархабо Бахромовнинг тумандаги сайлов участкалари бўғунг қундаги фаолияти юзасидан ҳисоботлари тингланди.

Ҳасанбой САЪДУЛЛАЕВ, "Тошкент ҳақиқати" муҳбири, Қобилжон ҒОҒУРОВ олган сурат.

Зулфия таваллудининг 100 йиллиги олдиндан

АРДОҚ ВА ЭЪЗОЗГА МУНОСИБ СИЙМО

Ўзбек халқининг сеvimли шоираси, таниқли жамоат арбоби Зулфия Исроилова ҳақида жуда кўп ва ҳўп айтилган. Лекин, ўз номи, илму аъмоли, эзгу амаллари, шарқона одоби билан ҳақиқий ўзбек аёли тимсолига айланган бу улуг зот ҳақида ҳар қанча сўзласак оз. Зеро, Зулфия ҳаёти ва ижоди одамларга, Ватанига бўлган меҳр-муҳаббат нурига ўсиб-унган гулзорга, ҳаманзорга ўхшайди. У эзгулик, вафою садоқат дарёсидан сув ичиб, завоқ билмас гулистонга айланган гўё.

Шоира ҳақида ҳурматли Президентимизнинг шундай сўзлари бор: "Нафақат ўз шеърлари, балки бутун ҳаёти билан ўзбек аёлининг маънавий қиёфасини намоён этган атоқли шоирамиз Зулфияхонимни ҳам мен ана шундай фидойи инсонлар қаторига қўшган бўлардим. Унинг жаҳон минбарларидан янграган шеърлари Шарқ аёлининг ақлу зақоси, фазлу қамолнинг ёрқин ифодаси сифатида миллионлаб шеърят муҳлисига одамлилик, муҳаббат ва садоқатдан сабоқ берган, десак, муболага бўлмас".

Шу ўринда Зулфия Исроилованинг узок йиллар (30 йил) "Саодат" журналага муҳаррирлик қилгани, бу даргоҳ ўша даврларда ижодкор аёлларга катта мактаб, халқимиз учун маънавият дарёси ва зиёфасини ўтаганини айтиш керак. Шунингдек, бу журнал шарқона гўзал ахлоқ, миллий руҳини акс эттириши билан халқ орасида эътибор қозongan эди. Мен эришган барча ютуқлари, эгаллаб турган лавозимидан қатъи назар, каттаю кичикка самимий муносабатда бўлган, бағрикенг, меҳри дарё, айна пайтда талабчан раҳбар аёл, устоз Зулфия опанинг фазилатлари барча аёлларга ибрат эканини таъкидлаш баробарида инсон қўнглига йўл фақат яхшилик билан топилишига амин бўламан.

(Давоми 4-бетда).

2015 йил – Кексаларни эъзозлаш йили

УСТУВОР ВАЗИФАМИЗ БЎЛИБ ҚОЛАДИ

2015 йилнинг "Кексаларни эъзозлаш йили" деб эълон қилиниши қарияларга эътибор ва ғамхўрликнинг ёрқин намунаси бўлиш билан бирга юртимизда кекса авлод вакилларига ҳурмат ва эҳтирмининг янги босқичини бошлаб берди, дейиш мумкин. Президентимиз

таъбирлари билан айтганда, ҳар қандай жамиятнинг ёши улуг одамларга эътибор ва ғамхўрлиги унинг маданий даражасини белгилайди. Кексаларга ҳурмат-эҳтиром, меҳр-оқибат кўрсатиш маънавий ҳаётимизнинг ажралмас қисмига айланган.

Айни пайтда мамлакатимизда 60 ёшдан ошганлар 2 миллион 873 мингдан зиёд. Эътибор беринг-а, Ўзбекистонда аҳоли саломатлигини муҳофаза қилишга жиддий эътибор берилаётгани натижада 1991 йилдан буён одамларнинг ўртача умр кўриши 67 ёшдан 73 ёшга, хусу-

сан, аёлларнинг умр кўриши 76 ёшга узайгани кўвончли ҳол, албатта.

Ёш авлод турмуш синновларида тобланиб, катта ҳаётий тажрибага эга улуг кишилар қўмаги ва маслаҳатига доимо эҳтиёж сезади. Меҳнатсевар, ҳалол, пок, диёнатли, эл иши учун

фидойи инсон бўлиб улғайишни истаган ҳар бир ўғил-қиз кексаларнинг ҳаётий тажрибасидан ўрнак олмоғи лозим.

"Кексаларни эъзозлаш йили" Давлат дастури Олий Мажлис Қонунчилик палатаси депутатлари олдида улкан вазибаларни қўйди. Бу

биринчи галда сайловчиларимиз олдида ўз бурч ва вазибаларимизни виждонан адо этишимиз билан боғлиқ. Шу билан бирга Давлат дастури депутатларимизга қабул қилинаётган қонунларга реал ҳаётда қай даражада эҳтиёж борлиги ва у қанчалик самарали ишлайди, деган саволни ўз олдида қўйган ҳолда, амалга оширилаётган ислохотлар, ҳаётий талабаларга мос, ҳар томонлама чуқур ва пухта қонунларни қабул қилиш ва уни амалга ошириш бўйича

аниқ тамойиллар ишлаб чиқиш вазибаларини юқлайди.

Албатта, дастурда белгиланган чора-тадбирлар ижросининг ҳуқуқий асосларини таъминлаш, ушбу йўналишдаги вазибаларнинг бажарилиши устидан назорат-таҳлил тадбирларини амалга ошириш парламентнинг

2015 йилдаги устувор вазибаларидан бири бўлиб қолади. Ўз ўрнида бу жараёнда Тадбиркорлар ва ишбилармонлар ҳаракати – Ўзбекистон Либерал-

демократик партияси ҳам фаол иштирок этиб, халқимиз ишончини қозониш, улар турмушига оид муҳим ижтимоий-иқтисодий масалаларни ҳал қилишда бор куч ва имкониятларини сарфбар этади.

Муҳаббат ТОХТАЕВА, Олий Мажлис Қонунчилик палатаси депутати, Демократик институтлар, нодавлат ташкилотлар, фуқароларнинг ўзини ўзи бошқариш органлари қўмитаси ва ЎзЛиДеП фракцияси аъзоси.

29 март – Ўзбекистон Республикаси Президенти сайлови куни

ЎЗБЕКИСТОН РЕСПУБЛИКАСИ ПРЕЗИДЕНТЛИГИГА НОМЗОД ҲОТАМЖОН АБДУРАҲМОНОВИЧ КЕТМОНОВНИНГ ТАРЖИМАИ ҲОЛИ ВА ДАСТУРИ ТАРЖИМАИ ҲОЛ



**ҲОТАМЖОН
АБДУРАҲМОНОВИЧ
КЕТМОНОВ**

Ўзбекистон Халқ демократик партиясидан Ўзбекистон Республикаси Президентлигига номзод Хотамжон Абдурахмонович Кетмонов 1969 йилда Андижон вилояти-нинг Балиқчи туманида туғилган.

Миллати – ўзбек. Маълумоти – олий, 1993 йилда йилда Андижон Давлат тиллар педагогика институтини тамомлаган.

Меҳнат фаолиятини 1993 йилда Фарғона вилояти, Тошлоқ туманидаги 28-сонли ўрта мактабда ўқитувчиликдан бош-

лаган. 1995-2004 йилларда Фарғона вилояти халқ таълими бошқармаси бош мутахассиси, бўлим бошлиғи, бошқарма бошлиғининг ўринбосари лавозимларида фаолият юритган.

2004-2013 йилларда Андижон вилояти ҳокимининг жамоат ва диний ташкилотлар билан алоқалар бўйича ўринбосари лавозимида меҳнат қилган.

Бу даврда Хотамжон Кетмонов вилоятда жамоат ташкилотларини ривожлантириш, минтақа-

нинг ижтимоий-иқтисодий масалаларини ечишда уларнинг ролини ошириш учун зарур шароитларни яратиш бўйича амалий чораларнинг ҳаётга татбиқ қилинишида фаол иштирок этди.

Унинг бевосита иштирокида вилоятда давлат ва жамоат ташкилотларининг ўсиб келаётган ёш авлодни баркамол ривожлантириш, ёшларнинг сиёсий, ҳуқуқий онгини юксалтириш, фуқаролик бурчларини англашлари йўлидаги фаолияти самарадорлигини оширишга

қаратилган комплекс чора-тадбирлар амалга оширилди.

2013 йилда Хотамжон Кетмонов Ўзбекистон ХДП Марказий Кенгаши раиси этиб сайланди.

Ўтган давр мобайнида партиянинг марказда ва жойлардаги ташкилий кадрлар салоҳиятини сезиларли даражада ошириш, партия электоратини ўйлантираётган ижтимоий-иқтисодий масалаларни ечишда партия ташкилотларининг Халқ депутатлари маҳаллий Кенгашларидаги партия гу-

руҳлари билан ҳамкорлигини яхшилашга қаратилган комплекс чора-тадбирларни амалга оширди.

2014 йилда у Ўзбекистон Республикаси Олий Мажлиси Қонунчилик палатаси депутати этиб сайланди.

2015 йилдан Олий Мажлис Қонунчилик палатаси Спикери ўринбосари, Ўзбекистон Халқ демократик партияси фракцияси раҳбари сифатида фаолият юритиб келмоқда.

Оилали, уч нафар фарзанди бор.

ДАСТУР

Мазкур дастурда, Ўзбекистон тарқиётининг бош стратегик мақсади – аҳоли турмуш даражаси юқори бўлган ривожланган демократик давлатлар қаторига қўшилиш, жаҳон ҳамжамиятида муносиб ўрин эгаллаш борасидаги вазифалардан келиб чиқиб, Ўзбекистон Республикаси Конституциясига қатъий амал қилиш, Ўзбекистон мустақиллигини асраш ва мустаҳкамлаш, Ватан равнақи, юртинчилиги, халқ фаровонлигини таъминлаш, фуқаролик ва миллатлараро ҳамжихатликни мустаҳкамлаш, ижтимоий барқарорликни таъминлашга қаратилган миллий манфаатларга содиқлик каби эзгу мақсадлар мужасамлашган.

Ушбу дастур Ўзбекистон Халқ демократик партиясининг дастурий мақсадларига асосланади. Унинг устуворликларни жамиятнинг барча аъзолари учун ҳар томонлама ривожланиш ва ишончли ижтимоий кафолатларни таъминлашга интилиш билан белгиланади.

Биз учун асосий устувор йўналишлар авваламбор аҳолининг давлат ва жамият томонидан қўллаб-қувватлашга эҳтиёжманд қатламлари манфаатлари ҳимояси йўлида меҳнатга лаёқатли кишиларнинг муносиб ҳақ тўланадиган иш ўринларига эга бўлишга интилишини қўллаб-қувватловчи, уларнинг шахсий ташаббускорлиги ва ишбилармонлигини рағбатлантирувчи кучли ижтимоий сиёсатни юритиш; мустақил ҳаётга кириб келаётган ёшларга, уларнинг ижтимоий келиб чиқишдан қатъи назар, касб танлаш, таълим олиш ва ўқув муассасаларини битиргач, албатта, биринчи иш ўрнига эга бўлишлари учун адолатли, тенг ва ижтимоий жиҳатдан мақбул шарт-шароитларни яратиш; пенсионерлар, ногиронлар, ота-она қарамоғидан маҳрум бўлган болалар ва меҳнатга лаёқатсиз аҳолининг бошқа ижтимоий гуруҳлари ҳаётий эҳтиёжларини тўлиқ қондиришни кафолатловчи пенсия таъминоти ва ижтимоий нафақаларнинг самарали тизимини шакллантиришдан иборатдир.

Биз аҳоли бандлигини таъминлаш тизимини доимий равишда такомиллаштириш зарур деб ҳисоблаймиз. Хусусан, қуйидагилар тақлиф этилади:

- муносиб иш ҳақи тўланадиган барқарор иш ўринларини тақдим этаётган корхоналарда меҳнатга лаёқатли аҳоли бандлигини таъминлаш бўйича саъй-ҳаракатларни фаоллаштириш. Улар қаторига, авваламбор, ишлаб чиқариш соҳасининг юқори технологик тармоқ корхоналари, хизмат кўрсатиш ва сервис соҳасида фаолият юритаётган корхоналар ва ташкилотлар кириди. Ушбу соҳаларга мамлакатда мавжуд бўлган бўш меҳнат ресурсларини фаол жалб қилиш иқтисодий ўсишнинг муҳим омилли ҳисобланади;
- касб-хунар коллежи битирувчи-

ларига имтиёзли микрокредитларни тақдим этиш, ўз бизнесини очишда белгиланган йиғимлардан озод қилиш орқали уларнинг мустақил бандлигини таъминлаш ҳамда яқка тартибдаги меҳнат ва тадбиркорлик фаолиятини рағбатлантириш учун мақбул шароитлар яратиш;

- истиқболли ишлаб чиқаришни ривожлантириш бўйича инвестиция дастурларини ишлаб чиқишда, уларнинг ўрта махсус касб-хунар ва олий маълумотли мутахассисларни тайёрлаш дастурлари ҳамда ҳудудий бандлик дастурларига ўзаро боғлиқ бўлган комплекс ёндашувни таъминлаш;

- тегишли мутахассисларга бўлган эҳтиёждан келиб чиқиб, кадрлар тайёрлаш учун олий ўқув юртига таълим контрактларини тўлаётган корхоналар ва ташкилотларни рағбатлантириш самарадорлигини ошириш;

- муносиб иш ҳақи ва меҳнат шароитига эга бўлган қўшимча барқарор иш ўринлари яратаётган тадбиркорлик субъектларининг манфаатдорлигини оширишга хизмат қилувчи солиққа тортиш тизимини янада мақбуллаштириш бўйича қўшимча чора-тадбирлар кўриш;

- олий ва ўрта махсус касб-хунар маълумотига эга мутахассисларни тайёрлаш йўналишларини аниқлашда корхоналар ва ташкилотларнинг кадрларга бўлган жорий ва истиқболдаги эҳтиёжларини ҳисобга олиш самарадорлигини ошириб бориш.

Кам таъминланган оилалар манзилли ижтимоий ҳимояси самарадорлигини янада ошириш зарур. Бунинг учун қуйидагилар тақлиф этилади:

- ижтимоий қўллаб-қувватлаш тизимини аҳоли ўртасида боқимандалик кайфиятини бартараф этишга қаратиш, уларнинг ташаббускорлигини рағбатлантириш, меҳнат ва тадбиркорлик фаолиятини қўллаб-қувватлаш ҳамда нафақалар ва моддий ёрдам асосан кам таъминланган оилалар, қариялар ва болалар учун тақсимланишини таъминлаш;

- адолат ва меҳр-оқибат, очиқлик ва ошқоралик тамойилларини кенг қўллаган ҳолда, маҳалла институтининг аҳоли ижтимоий ҳимоя қилиш маркази сифатидаги ўрни ва аҳамиятини доимий равишда ошириб бориш;
- ўз бизнесини ташкил этиш ва турмуш фаровонлигини мустақил таъминлашга интилувчи меҳнатга лаёқатли фуқароларга имтиёзли кредитлар ва мақсадли фойизсиз ссудаларни ажратишни янада ривожлантиришни таъминлаш;

- кам таъминланган оилаларга ҳар ойда тўланадиган моддий ёрдам ва ижтимоий нафақаларни, тегишли даврдаги тўланадиган маблағлар суммаси микдоридан, ўз бизнесини ташкил этиш учун мақсадли фойдаланиш шарти билан бир марталик тўловга алмаштириш механизмни ишлаб чиқиш;

- ижтимоий аҳамиятга эга бўлган товарлар ва хизматлар нархини шакллантириш устидан давлат назоратни самарадорлигини янада ошириш орқали уларнинг нархи ва тарифлари ўсиши инфляция даражасидан юқори бўлмаслигини таъминлаш;

- уй-жойларнинг ижтимоий мақбул-лигини таъминлаш мақсадида, ижтимоий тураржой фондиди шакллантиришга йўналтирилган давлат мулк-ини хусусийлаштиришдан олин-адиган маблағларнинг бир қис-мидан самарали фойдаланиш механиз-мларини янада такомиллаштириш-ни таъминлаш;

- тармоқ муҳандислик инфратузил-маси билан боғлиқ бўлмаган комму-нал хизматлар кўрсатишнинг арзон автоном (локал) шакллари-ни ривож-лантириш орқали аҳолига кўрсатила-диган хизматлар нархини мақбуллаш-тиришга эришиш;

- табиий монополия субъектлари томонидан аҳолига тақдим этила-диган коммунал хизматлар нархлари ва тарифларини давлат томонидан тар-тибга солиш механизмларини тако-миллаштириш (газ, электр ва иссиқ-лик таъминоти, канализация, маиший чиқиндилар ва ҳ.к.).

Иқтисодий сиёсатдаги асосий устуворлигимиз бу – давлатимиз-нинг молиявий ва иқтисодий қудра-тини оширишни кучли ижтимоий сиё-сатга уйғунлаштириш орқали аҳоли-нинг, авваламбор, қўллаб-қувватлаш-га эҳтиёжманд қатламлари турмуш даражасини янада ошириш механиз-мига йўналтиришдан иборатдир. Шу боис иқтисодий соҳада қуйидагилар тақлиф этилмоқда:

- хўжалик юритувчи субъектлар то-монидан ишлаб чиқарилаётган товар-лар ва хизматлар сифатини ошириш, таннарини пасайтириш, замонавий техника ва технологиялардан фойда-ланиш, шунингдек, уларнинг экспорт имкониятларини кенгайтириш, аҳоли-нинг харид қобилиятини оширишга хизмат қилувчи рақобат муҳитини шакллантиришга алоҳида эътибор қаратиш;

- тўғридан-тўғри чет эл инвести-цияларини жалб қилиш ва малакали мутахассислар учун иш ўринларини ташкил этиш орқали замонавий тех-ника ва технологияларга асосланган ишлаб чиқаришни ташкил этишга қаратилган чора-тадбирларни ишлаб чиқиш;

- тижорат банкларининг инвести-цион лойиҳаларни молиялаштириш-даги иштирокини янада кенгайтириш, хўжалик юритувчи субъектларни кре-дитлаш тизимини соддалаштириш, макроиктисодий вазиятдан келиб чи-қиб, минимал даражада фойз став-каларини белгилаш, муаммоли қарз-лар юзга келишига йўл қўймаслик ва банк хизматлари сифатини яхши-лаш орқали уларнинг инвестицион фа-оллигини кучайтириш;
- бюджет маблағларининг, айниқ-

са, ижтимоий соҳага йўналтирила-диган маблағлар мақсадли равишда сарфланиши устидан қатъий назорат-ни кучайтириш, турли маҳсулот ет-казувчиларга ўзаро эркин рақобатла-шишга имкон берадиган очиқ ва ош-қора электрон савдолар имкониятла-рини кенгайтириш орқали давлат ха-ридларини амалга ошириш тизими-ни такомиллаштириш.

Истиқболли корхоналар ва ишлаб чиқариш комплекслари иқтисодий ри-вожланиши учун бўш меҳнат ресурс-ларини жалб қилиш иқтисодий ўси-шининг барқарор юқори суръатларини таъминлашнинг қўшимча омил-ига айланишига эришиш муҳим аҳамия-тга эга. Бунинг учун қуйидагилар та-клиф этилади:

- маҳаллий хом ашё ва материал-ларни қайта ишлаш корхоналарини улар томонидан ички ва ташқи бо-зорда рақобатбардор, юқори қўшим-ча қийматга эга истисмол товарла-рини ишлаб чиқаришни иқтисодий ва молиявий рағбатлантириш ва им-тиёзли кредитлаш самарадорлигини ошириш;

- ўз ишлаб чиқариши ҳисобига ички бозорни мақбул тарзда тўлди-ришга эришишга қаратилган товар-лар ва хизматларни ишлаб чиқариш-ни ривожлантириш ҳудудий дастур-ларини ишлаб чиқиш ва амалга оши-риш учун ҳудудий давлат ҳокимия-ти ва бошқаруви органлари масъули-ятини кучайтириш бўйича чора-тад-бирлар кўриш;

- мамлакатда ишлаб чиқарилаёт-ган қишлоқ хўжалиги маҳсулотларини қайта ишлаш бўйича қишлоқ жойла-рида оилавий тадбиркорлик ва каса-начиликни ривожлантиришда рағбат-лантиришни кучайтириш.

Аҳолига юқори сифатли ва мак-бул тиббий ёрдамдан кенг фой-даланиш имкониятини таъминлаш масаласи ҳам бизнинг диққат марказимиздир. Мазкур соҳада, жумладан, қуйидагилар тақлиф этил-моқда:

- аҳоли, айниқса, олис қишлоқ ҳудудларида бирламчи тиббий ёрдамдан қулай ва тез фойдаланиш имкониятини таъминловчи қишлоқ врачлик пунктлари тармоғини кенгай-тириш бўйича чоралар кўриш;
- имтиёзли ва бепул асосда мала-кали тиббий-санитария ёрдами кўрсатилишини тартибга солувчи те-гишли қонун ҳужжатларининг ижроси устидан тизимли назорат самарадор-лигини ошириш;
- фармацевтика корхоналари ва до-рихона муассасалари фаолияти, дори-дармон воситалари нархи ус-тидан давлат назоратини кучайтириш ҳамда дори воситалари рекламси-ни чеклаш.

Демократик ҳуқуқий давлат ва очиқ фуқаролик жамиятини шакл-лантириш асосий вазифа ҳисоб-ланади. Ушбу мақсадда қуйидагилар тақлиф этилмоқда:

- қабул қилинаётган қонунлар ва бошқа қонун ҳужжатлари, давлат бошқаруви органлари фаолияти на-тижаларини ошқора ва конструктив муҳокама этишда фуқаролик жамия-ти институтлари иштироки амалиё-тини изчил ривожлантиришни таъ-минлаш;

- доимий электорат манфаатлари-га алоқадор бўлган жойлардаги дол-зарб иқтисодий ва ижтимоий вазифа-ларнинг ҳал этилишига таъсир кўрсатиш масалаларида сиёсий партиялар ва уларнинг депутатлик бирлашмалари ҳуқуқ ва воқолатлари-ни янада ошириш бўйича чоралар кўриш;

- замонавий ахборот-коммуника-ция технологиялари асосида аҳолига интерфаол давлат хизматлари ягона порталдан эркин фойдаланишни тақ-дим этувчи пунктлар тармоғини ри-вожлантириш бўйича чора-тадбирлар кўриш;

- ижтимоий шериклик институтини янада ривожлантиришни изчил таъ-минлаш;

- фуқаролар ҳуқуқларини ҳимоя қилишнинг суд механизмлари омма-боплигини кенгайтириш ва мазкур масалаларда суд назоратини кучай-тириш ҳисобига суд қарорлари иж-роси сифатини ошириш бўйича чора-тадбирлар ишлаб чиқиш.

Ташқи сиёсат фаолияти маса-лаларида қуйидагилар тақлиф этилмоқда:

- Ўзбекистоннинг яқин қўшнилари-га нисбатан очиқ ва прагматик сиё-сатни юритиш, улар билан савдо-иқтисодий ва маданий-гуманитар со-ҳаларда ўзаро манфаатли ва ўзаро фойдали ҳамкорликни ривожланти-риш;

- минтақадаги экологик вазиятни яхшилаш, Марказий Осиё трансчега-равий дарёлари сув ресурсларидан оқилона фойдаланиш масалалари бўйича мамлакатнинг халқаро ташаб-бусларини фаол илгари суришни таъ-минлаш;

- ташқи сиёсат фаолиятининг му-ҳим вазифаси Ўзбекистоннинг мин-тақавий хавфсизлик ва барқарорлик-ни мустаҳкамлашда фаол ва ташаб-бускор иштирокини таъминлашдир. Шундан келиб чиқиб, Марказий Осиё мамлакатлари, дунёнинг бошқа дав-латлари, нуфузли халқаро ташкилот-лар билан терроризм, экстремизм, наркотрафик, одам савдоси ва бош-қа таҳдидларга қарши кураш масала-лари бўйича ҳамкорлик муносабат-ларини ривожлантириш ва кучайти-риш зарур.

Дастурда қайд этилган устувор йўналишларни амалда рўйбга чиқар-иш мамлакатни ҳар томонлама иж-тимоий ривожлантириш, халқ фаро-вонлигини изчил юксалтириш, демок-ратик ўзгаришларни чуқурлаштириш ва фуқаролик жамиятини ривожлан-тиришга хизмат қилади.

Зулфия таваллудининг 100 йиллиги олдидан



АРДОҚ ВА ЭЪЗОЗГА МУНОСИБ СИЙМО

Шунинг учун ҳам Зулфия нафақат ижодкор, балки жамоат арбоби сифатида ҳам қадри. Унинг тинчлик ва дўстликни тараннум этувчи асарлари ҳамда тараққийпарвар Осиё ва Африка ёзувчилари ҳаракатидаги фаол иштироки халқро Жавоҳарлаъл Неру, "Нилуфар" мукофотларига муносиб қўрилган.

Дарҳақиқат, Зулфияхонимнинг ҳаёт йўли давлатимиз раҳбарининг доимий эътиборида бўлди. Жумладан, Зулфия номидаги Давлат мукофотининг таъсис этилиши, "Тошкент шаҳрида Ўзбекистон халқ шоираси Зулфиянинг ҳай-

(Давоми. Боши 1-бетда).

калини ўрнатиш тўғрисида"ги Қарори ижроси, ниҳоят, 100 йиллик тўйи кенг нишонланаётгани фикримиз далили. Бундай эътибор ва эътироф барча аёллари-миз, қизларимизни руҳлантириб, уларга гайрат-шижоат бахш этаётгани аниқ ҳақиқат.

Мана, 15 йилдики, вилоятимизнинг иқтидорли, истеъдодли қизлари "Зулфия номидаги давлат мукофоти"га номзодлар танловида фаол иштирок этиб келишди. Бугунги кунда ушбу мукофот совриндорлари 15 нафарга етди. Улар, албатта, бизнинг фахримиз. Ҳозирги кунда Зулфия издошларидан бири Гулноза Турғунбоева "Саодат" журналада

бўлим бошлиғи. Депутатликка сайланган совриндорларимиз ҳам бор. Екатерина Аблаева Халқ депутатлари вилоят Кенгаши депутати, Жисмоний тарбия институти ўқитувчиси, Камола Пардабоева эса Халқ депутатлари Ўрта Чирчиқ туман кенгаши депутати, коллеж ўқитувчиси. Умуман олганда, вилоятимизда Зулфия издошлари, "Ораста қизлар"имиз кўп, атоқли шоира ижодида ҳавас қилувчи мухлислари, шогирдлари талайгина. Демак, Зулфия яратиб кетган ижод боғи мудом гуллаб-яшнайдир.

Сайёра ФАЙЗИЕВА,
вилоят ҳокими ўринбосари,
хотин-қизлар кўмитаси раиси.

ЭНТИКИБ ШИВИРЛАР
ЎРИК ГУЛЛАРИ

"Ҳаёт китобини аста варақлаб",
Мусаффо тонларнинг туйдим ифорин.
Сабр ва вафонинг мунис сабоси —
Дилдан юзиб кетди йиллар ғуборин.

Аёл қалбидаги буюк соғинччи —
Шеърлар китобидан ўқийди осмон.
Ўрик дарахтининг томирларида,
Югура бошлайди ажиб ҳаяжон.

Дунёда шоиру шоира кўндир,
Балки доврўқ солган шавкату шони.
Аммо ягонадир меҳру вафода
Ўзбекнинг бетимсол Зулфияхони.

Халқ дарди, шодлиги кўнгилда эди.
Миллат туйғусидан эди туйғуси.
Ватаннинг ҳар чечак, ҳар майсасида,
Жаранглаб турарди буюк орзуси.

Шеърлари қатидан дарё тўлқини,
Эшитилиб туради руҳимга гўё.
Энтикиб шивирлар ўрик гуллари:
"Ахир дарёдилдан қонади дарё".

Улуғ шоирасин ёд этиб бугун,
Назмига гул қўяр Ўзбекистоним.
Дилларга жилмайиб кириб келади,
Баҳорни етаклаб Зулфияхоним.

Абдуғани СУЛАЙМОН.

Бу — қизик

Айиққа гувоҳнома берилди

Россиялик цирк устаси Валентин Филатовнинг машҳур айиқлар цирки Штутгартда гастроль сафарида бўлганда қутилмаган ҳолида рўй беради. Репетиция пайтида мотоцикл минган айиқ арена чегарасидан, сунгра цирк дарвозасидан чиқиб, катта кўчадаги машиналар оқими-га қўшилиб кетди. Филатов машинада унга етиб олиб, тўхтатгунга қадар айиқ учта чорраҳани кесиб ўтишга улгурди. Чорраҳаларнинг ҳар бирида ҳаракатни назорат қилувчилар ноанъанавий "ҳайдовчи"га йўл бериб туришди. Шу кунги кечга бориб Штутгарт полицияси айиққа рамзий ҳайдовчилик гувоҳномасини топширди.

«Қондани бузишдан
қўрққанми?»

Илк йўл ҳаракати қондаларини ишлаб чиққан америкалик Уильям Фелпс Ино ҳеч қачон машина ҳайдамаган.

Одабийлик шеваси

Такси юриб кетган, Мажид тўрхалтасини унутиб қолдирганини эслади. Эҳ, аттанг, кекса отасига лаҳм гўшт, иссиқ нон билан новот сотиб олганди-я... Ҳа, майли, энди қидиргани билан тополмайди. Шаҳарда нима кўп, такси кўп...

У ота уйига кириб борганда, келин ховли супураётган, кекса отаси неварасини аравачада кенг ховлида айлантдириб юрганди. Мажид отаси билан кучоқлашиб қўришди. Аравачадаги ўқасининг боласини эркалаб, юзидан ўпди. Келини билан сўрашиб, супага омонат қўйди. Шу пайт кўшни келин дарвозадан бош сукди:

— Кеннойи, сут-қатиқ оласизларми?
Мажид иргиб турди, ота уйига куруқ қўл билан келгандан хижолат эди. Анчагина сут-қатиқ сотиб олиб, кўнгли ёришди. Ахир... Падари бузруквори уни ва укаларини ҳам ота, ҳам она бўлиб оёққа турғазди. Мана



энди набираларини тарбия-ляпти. Аслида кексалар ёш боладек, кўнгли майин тортиб қоларкан. Бўлак бўлиб чиққан болалари йўқлаб келавермаса, дили оғрийди, ўксинади. Онасидан кейин кўп уриниб, уларни уйли-жойли қилди, оғзидаги ошини шуларга едирди, ўзи қиймай қийдирди...

ЭҲСОН

— Кўй, болам, ортиқча харажат наҳажат... Келин, мана буларни ол, иссиқ нон билан чой ичамиз, — дея, ўглини узоқ дуо қилди ота...
Иттифоқ, бир кун нарсаларини унутиб қолдирган ўша "Матиз"га ўтириб қолди. Ҳайдовчи ҳам Мажидни дарров таниди:

— Э-э, ака, ўша кунни тўр-

халтангиз қолиб кетибди-я. Нарсаларингизни кечгача олиб юрдим. Кейин... Шундоққина ён қўшимиз Умрия холанинг ёлғизи Тилавой ака автохалокатда ҳалок бўлиб, шўрлик келин тўрт гўдаги билан қолганди. Тўнгичи энди мактабга чиққан. Нарсаларингизни ўшаларга олиб чиқиб бердим. Ҳар ҳолда савобидан баҳраманд бўлдингиз, ака, — деди.

Мажиднинг кўнгли ёришиб кетди:
— Яшанг, ука, кўнглимдаги иш бўлибди. Ўша кунги кекса отамни қўришга кетаётганим, хаёл билан бўлиб... Раҳмат сизга, менга икки хисса савоб ёғилибди, — деди қўзларни ёниб.

У ишхонасига кириб бораркан, нималардир сабаб бўлиб, узилиб қолган бир неча ойлик машинани бирдан қўрибди. Бунинг устига у ишлаётган бўлим йириккина янги лойиҳани қўлга киритибди...
Нигора ШОФАЙЗИЕВА.

Биласизми?

Дунёда ҳар бир халқ, миллат ва элатнинг ўз урф-одат, анъаналари мавжуд. Бир халқнинг қадрият ва маросимлари иккинчисикича сира ўхша-

майди ёки бир элатда мавжуд одат ва анъана бошқа миллатда ўзга маъно-мазмун касб этиши мумкин.

Эронликлар олдида
бош бармоғингизни
кўтара кўрманг...

Британияда бу одат худди биздагидек "Ҳаммаси яхши, жойида" деган мазмунни ифодалайди. Эронда эса аксинча, бордию сиз бирор эронликка бармоқларингизни букиб, бош бармоқни тегала қилиб кўрсатсангиз, тош ёмғири остида қолишингиз турган гап. Негаки, айнан шу белги эрон халқлари муомаласида уятсиз тақлиф маъносини билдирар экан.

Таиландда одамлар
бошига қўл теккизиш
мумкин эмас

Аҳолисининг асосий қисми буддавийлик динига эътиқод қиладиган айрим мамлакатларда, масалан Таиландда инсон боши муқаддас ҳисоб-

ланади, гўёки рух шу аъзода жойлашган экан. Шунинг учун бу ерда одамларнинг бошини силлаш, умуман қўл теккизиш ҳақорат саналади. Шунга ўхшаш одатлардан бири малайзияликларда кенг тарқалган. Агар сиз у ёки бу нарсани бармоқ билан кўрсатиб, аниқлик киритмоқчи бўлсангиз, қулгига қоласиз, чунки Малайзияда аниқ шу белги мушаклар шиширилган ҳолатни ифодалар экан.

Филиппинликларда галати одат мавжуд. Улар нарсаларни кўрсатишганда лаб ва қўзлари билан имошора қилишади.



ПАРИЖ ОСМОНИДА НУЖЛАР

Чоршанбага ўтар кечаси Париж осмонида яна бир нечта майда ўзи учар аппаратлар кузатилгани ҳақида хабар тарқатди FMTV ахборот телеканали.

Полициядан маълум қилишларича, бу гал НУЖлар мамлакат пойтахтидаги Келишув майдони, шунингдек, шаҳар чегараси осмонида пайдо бўлди. Полициячилар ҳамда йўловчилар ўзи учар аппаратларни су-

ратта ва видеога туширишга муваффақ бўлдилар. Бироқ, ушбу аппаратларни кимлар бошқараётганини аниқлашнинг имкони бўлмади.

Ўша тунда НУЖлар пойтахтининг бир қанча туманида, хусусан, Эйфел миносари, шунингдек, Елисей саройи яқинидаги АҚШ элчихонаси устида ҳам пайдо бўлди. Америка элчихонаси узра парвоз масаласини ўрганиш ҳаво транспорти жандармериясига топширилди. Бошқа ҳолатлар билан эса Парижнинг жиноят ишлари полицияси шуғулланмоқда.

ОБАМА КЎВУР ҚУРИШНИ ТАКИҚЛАДИ

АҚШ президенти Барак Обама Канададан тортиб келинадиган кўвур қурилиши билан боғлиқ қонун лойиҳасини тақиқлаб қўйди.

"Ушбу қонун лойиҳаси мамлакат ижроия ҳукумати қабул қилган иш тартибига зид бўлиб, бизнинг миллий манфаатларимиз, жумладан, атроф-муҳитни муҳофаза қилишга зарари тегиши мумкин. Айнан шу нуқтаи назардан мен ушбу қонун лойиҳасини тақиқлаш ҳуқуқимдан фойдаландим" дейилади давлат раҳбарининг баённомасида. Вакиллар палатаси мажлисида ушбу кўвур қурилишини 270 киши ёқлаб, 152 киши эса қарши ташкил этилади. Канаданинг Альберт вилоятидан АҚШнинг Небраска штатига-ча давом этадиган 2450 километрли кўвур қурилиши лойиҳаси 2008 йилда тақлиф этилган. Республикачиларнинг фикрига қараганда, у минглаб янги иш ўринлари очингга ёрдам беради. Лойиҳанинг қиймати 7 миллиард доллар.

ҲУКУМАТ ЯШИРИН ЦЕНЗУРАДА АЙБЛАНДИ
Япониялик журналистлар бош вазир Синдзо Абэни оммавий ахборот воситалари учун яширинча цензура жорий этганлигида айблалар.

Улар чиқарган баён-номада таъкидланганича, ушбу ҳол сўз эркинлиги тамойилини хавф остида қолдириши мумкин. Қўлаб, жумладан, муҳо-лифати оммавий ахборот воситалари ҳам кейинчалик керакли ахборотларни олиш имкониятидан маҳрум бўлишдан чўчиб, ҳукуматнинг бу қарорини танқид қилмай турибдилар. The Japan Today наشري ички цензура хусусида бир қанча мисоллар келтирди.

Абэ бошлиқ ҳукумат эса ўзига қарашли барча айбловларни рад этмоқда. Япония вазирлар маҳкамаси бош котиби Ёсихидэ Суганинг айтишича, мамлакатда сўз эркинлиги тамойилига тўла амал қилинмоқда. Террорчилар томонидан гаровга олинган япон журналистлари тақдирига оид муаммо масаласи эса нотўғри баён этилганини таъкидлади.

Маълумки, шу йил 20 январь кунги террорчилар япониялик икки кишини гаровга олиб, 200 миллион доллар тоvon пули талаб қилишганди. Агар Токио уч кунлик муддатда ушбу суммани тўламаса, гаровдагиларни қатл этишларини айтишган эди. Охир-оқибатда ҳар икки фуқаро ҳам ўлдирилганди.

СЎРОВ НАТИЖАЛАРИ БЕКОР ҚИЛИНДИ

Испаниянинг конституциявий суди ўтган йилнинг ноябрь ойида ўтказилган Каталониянинг мустақиллигига доир сўров натижаларини ноқонуний деб топди. Ўша сўров жараёнида овоз берганларнинг 80 фоиздан кўпроги Каталониянинг тўлиқ суверенитетини ёқлашган эди. Бунда сайловчиларнинг фақат учдан биригина овоз беришда қатнашганди.

Конституциявий суд Испания ҳукуматининг Каталония мустақиллигига оид сўров ҳужжатлари конституция талабларига мос келмаслиги юзасидан давросини қўриб қикди. Шундан сўнг юқоридаги қарор конституциявий суднинг барча судьялари яқдиллиги билан қабул қилинди. 2014 йилнинг 29 сентябрида Испания конституциявий суди мамлакат ҳукуматининг Каталония етакчиси Артуро Масонинг мустақиллик хусусида сўров ўтказиш тўғрисидаги фармони асосий қонунга зид эканлиги тўғрисидаги давросини қўриб қикдиш учун қабул қилиб, сўров ўтказишни тўхтатиб қўйган эди. Бироқ, мухторият ҳукумати ушбу қарорга бўйсунмади.

Интернет хабарлари асосида тайёрланди.



Қаловини топсанг қор ҳам ёнади.

ТОШКЕНТ ҲАҚИҚАТИ

ТАШКЕНТСКАЯ ПРАВДА

Муассис:

Тошкент вилояти ҳокимлиги

Бош муҳаррир

Убайдулла

АБДУШОҲИДОВ

Маъзилмяз:

100000,
Тошкент шаҳри,
Матбуотчилар
кўчаси, 32.

e-mail:

th.tp@mail.ru

Қабулхона:

Бўлим муҳаррирлари ва

муҳбирлар:

Шартнома ва эълонлар:

Ҳисоб-китоб бўлими:

Телефонлар:

233-64-95, 233-55-39,
233-58-85 (факс).

233-12-83, 233-48-08.

233-56-03, 233-65-59.

233-54-10.

Тошкент вилояти Матбуот ва ахборот бошқармасида 2011 йил 12 январда 03-001 рақами билан рўйхатга олинган.

Газета «Тошкент ҳақиқати» тахририят компьютер марказида терилди ва саҳифаланди.

Навбатчи муҳаррир

Ҳасанбой САЪДУЛЛАЕВ

Навбатчи

Авазбек ХУДОЙҚУЛОВ

Саҳифаловчи

Тоҳир МАҲМУДУДЖАЕВ

Ҳафтанинг чоршанба ва шанба кунлари чиқади.

Буюртма S-2259.

Адади 15556.

Баҳоси қилишлан нарҳда

Ҳажми — 2 табоқ, офсет усулида босилди, қоғоз бичими А-2.

ISSN 2010-9318.